

# Gvangjsih Minzcuz Bau

ganhhau: CN45-0036 B.2013 Nd.9 Ng.4 liggaueq gveiqceih nienz ndwencaet ngeihgouj

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3089期

## Cungzcoj Si Haenq Guh Hong Vah Saw Saujsu Minzcuz Fazcanj Vwnzva Minzcuz

### 崇左市以民语工作推进民族文化发展

Daj bineix daeuj, Cungzcoj Si gak gaep bumwnz yawjnaek hong vah saw saujsu minzcuz, doihaeuj vwnzva minzcuz fazcanj.

It dwg haenqrengz guh gvangjbo yingjsi Vahcuengh. Bineix, Ningzmingz Yen Densidaiz laebdaeb haibo cezmuiz 《Sinhvwnz Vahcuengh》, Bingzsiengz Si Densidaiz youh youq 6 nyied 23 hauh haibo cezmuiz 《Sinhvwnz Vahcuengh》. Youq guh gvangjbo fuengmienh, Ningzmingz Yen, Denhdwngj Yen moix ngoenz haibo lanzmuiz 《Sinhvwnz Vahcuengh》, Bingzsiengz Si hix youq 6 nyied 3 hauh hai bo, Lungzcouh Yen couh yaek haibo lo. Dangqnaj gaenq lozsiz cienzngaenz 5 fanh maenz.

Ngeih dwg gyarengz guh hong youq sevei yungh Sawcuengh sij baiz, gvangjgau rogranz daengj. Dangqnaj, daengx si guekgya gihgvanh, saehnieb danhvei gij cih gwnz baiz cungj aeu Cuengh Gun song cungj saw sij; gij gvangjgau rogranz, byauhci roen, baizroen daengj hix cungj aeu Cuengh Gun song saw sij. Linghvaih, daengx si minzyij hidungj dawz 6000 aen diegmingz ndaw saw 《Yawj Caez Vwnzva Cungzcoj》 fanhoiz baenz Sawcuengh.

Sam dwg cizgiz banh eu fwen doxdax, gyagiengz Vahcuengh fuzvu gunghwnz. 4 nyied 9 hauh, si minzvej, vwnzvagiz lienzhab gawjbanh cietbofwen Bouxcuengh eu fwen doxdax; gak yienh(si, gih) hix

cungfaen leihyungh “Sam Nyied Sam”, cietbofwen conzdungj nem cietgingq hozdung, gawjbanh eu fwen doxdax, senhconz fuengcim cwngcwz dangj nem guekgya, hawj saedcej vwnzlai fungfouq.

Seiq dwg haibanh Cuengh Gun song vah saw sawqdiemj siujyoz nem ban maij hag Sawcuengh. Dangqnaj, Cungzcoj Si banh Cuengh Gun song vah saw siujyoz sawqdiemj yozyau 4 aen, caemhcaiq youq Lungzcouh Yen Minzcuz Cunghyoz, Denhdwngj Yen Minzcuz Siujyoz hai ban maij hag Sawcuengh, cujyau son hagseng hag singmeh, yinhmeh, singdiuh Sawcuengh nem go Vahcuengh.

(Dwng Haijcouh)

### SIUSIK DINJ

#### 简讯

● Bineix, Gvangjsih Lijgungh Cizey Yozyau gonqlaeng youq Bwzswz Si nem Gveilinz Si mizmbangj mbanj gungzhoj hai vunzhong lawh hong ciuvey beizyinhbanh 23 aen, beizyin doenghboux gungzhoj saujsu minzcuz gyawj cien boux, vih gih raeuz dieg gungzhoj fazcanj ginghci nem sevei okrengz.

(Cinz Den)

● Lungzcouh Yen ndaej guekgya dinghguh aen yienh minzcuz mouyi, yiengjsouh guekgya gij cwngcwz guh minzcuz mouyi nem swngheanj doenghyienh minzcuz daegbied haenx ndaej daigvanj youhvei leihsik. Ciuq cam rox, daj bineix daeuj aen yienh neix miz seiq aen mouyi giyez ndaej gij leihsik boujdiep daigvanj 3233.26 fanh maenz.

(Veiz Ningzswng)

● Gaenh bi daeuj, Sanhgyangh Dungcuiz Swciyen gyoengqvunz guh vwnzva saehnieb cug bi cug lai, souhaeuj hix laebdaeb daezsang. 2012 nienz, aen yienh neix doenghboux guh vwnzva haenx gyawj 3000 vunz. Bineix 1 daengz 7 nyied, daegsaek vwnzva canjyey souhaeuj gaenq mauhgvaq 3500 fanh maenz.

(Yangz Mingz)

● Daj bineix daeuj, Nazboh Yen Minzcuzgiz aeu gak yangh(cin) sam nyied “ciet hawfwen”, Yauzcuz “ciet Buenzvuengz” guh gihvei, haeujaeg gaihcanj minzcuz cwngcwz senhconz hozdung, gungh fat minzcuz cwngcwz senhconz swhliu 5000 lai faenh, ciep vunzlai cam 250 vunzbaez.

(Liengz Beizcuh)

● Dangqnaj, Lungzlinz Gak Cuz Swciyen Dwzngoz Yangh vunz lajmbanj camgya baujyenj beijlaeh 100%, doenghboux 60 bi doxhwnj ndaej lingx ciengxlaux baujyenj haenx miz 3352 vunz, fatcuengq beijlaeh 100%, saedyienh lajmbanj cienzbouh ndaej yiengjsouh ciengxlaux baujyenj.

(Dauz Dwzgvangh)

### Gunghcwngz: Vwnzva Yauzcuz Yinx Hekyouz



#### 恭城: 瑶族文化魅力足

8 nyied 27 hauh, Gvangjsih daengx gih cwnghez bauqcej geizgan senhconz gunghcoz vei yi youq Gunghcwngz Yauzcuz Swciyen hai. 8 nyied 26 hauh banhaemh, baih banh hoih cingj doenghboux camgya haihoih haenx daengz ndaw yienh Miuhvujmyau ngonzyawj vwnzva ndawbiengz Yauzcuz baijyienj, caeuq vunzlai caemh guh' angq. Gyoengqde youq guh' angq ndawde caenh' ithouh roxyiuj vwnzva daegbied saujsu minzcuz dangdieg, caez haenh vwnzva Yauzcuz daegsaek noengzna, cungj nyinhnaeuz haifat henhoh nem yenzgiu gij vwnzva maenhndei neix haengjdinh dij. Ndaw doz dwg aen yienh neix doenghboux Yauzcuz cingq byaujyenj cezmuiz vwnzva ndawbiengz Yauzcuz.

(Cwng Ciminj ingj)

### Bingzgei Guenjieix Gih Fuzbinz Hanghmoeg Hawj Saujsu Minzcuz Souh'ik

#### 平桂管理区扶贫项目惠及少数民族群众

Hocouh Si Bingzgei Guenjieix Gih miz vunz saujsu minzcuz 5.6 fanh, ndawde miz 3 fanh vunz comzyouq hingzcwngcunh saujsu minzcuz, 2 fanh lai vunz mbek youq hingzcwngcunh wnq. Bineix, aen gih neix vih gajndeij gij diuzgen saedcej dieg gungzhoj, roengz 452.9 fanh maenz guh hanghmoeg fuzbinz, baugvat gyauhdungh, yinxraemx,

canjyey bangcoengh daengj 31 aen. Ndawde ceng' aeu cienzngaenz caizcwng 430 fanh maenz, cienzngaenz wnq 22.9 fanh maenz. Youq dieg saujsu minzcuz roengz cienzngaenz 377.7 fanh maenz, ciemq cungjsoq 83%, ndawde guh yinxraemx gunghcwngz hanghmoeg 3 aen, roengz 16.9 fanh maenz, gyauhdungh hanghmoeg 13 aen, roengz 279.4

fanh maenz, canjyey bangcoengh hanghmoeg 6 aen, roengz 81.4 fanh maenz. Guh gij hanghmoeg neix, hawj gihcu j sezsih engq caezcienz, doidoengh dieg minzcuz ginghci ndaej fazcanj, vih coicaenh gak minzcuz huzndei caemhyouq, caensim doxcoengh, huzndei fazcanj laeb giekdaej gig maenh.

(Vuz Lifangh)